

四庫全書

史部

欽定四庫全書

宋史卷一百九十

元中書右丞相總裁托克托等修

兵志第一百四十三

兵四 鄉兵一

陝西保毅

河北忠順

河北陝西強人砦戶

河北河東強壯

河東陝西弓箭手

河北等路弓箭社

鄉兵者選自戶籍或土民應募在所團結訓練以爲防

守之兵也周廣順中點秦州稅戶充保毅軍宋因之自建隆四年分命使臣往關西道令調發鄉兵赴慶州咸平四年令陝西係稅人戶家出一丁號曰保毅官給糧賜使之分番戍守五年陝西緣邊丁壯充保毅者至六萬八千七百七十五人七月以募兵離去鄉土有傷和氣詔諸州點充強壯戶者稅賦止令本州輸納有司不得支移之先是河北忠烈宣勇無人承替者雖老疾不得停籍至是詔自今委無家業代替者放令自便自是

以至天禧間并代廣銳老病之兵雖非親屬而願代者
聽河北疆壯恐奪其農時則以十月至正月旬休日召
集而教閱之忠烈宣勇廣銳之歸農而闕員者並自京
差補戍於河上而歲月久遠者則特爲遷補貧獨而無
力召替者則令逐處保明放停當是時河北河東有神
銳忠勇強壯河北有忠順強人陝西有保毅砦戶強人
強人弓手河東陝西有弓箭手河北東陝西有勇義麟
州有義兵川陝有土丁壯丁荆湖南北有弩手土丁廣

南東西有槍手土丁邕州有溪洞壯丁土丁廣南東西有壯丁當仁宗時神銳忠勇強壯久廢忠順保毅僅有存者康定初詔河北河東添籍強壯河北凡二十九萬三千河東十四萬四千皆以時訓練自西師屢劄正兵不足乃籍陝西之民三丁選一以為鄉弓手未幾刺充保捷為指揮一百八十五分成邊州西師罷多揀放焉慶歷二年籍河北強壯得二十九萬五千揀十之七為義勇且籍民丁以補其不足河東揀籍如河北法其後

議者論義勇爲河北伏兵以時講習無待儲廩得古寓兵於農之意惜其束於列郡止以爲城守之備誠能令河北邢冀二州分東西兩路命二郡守分領以時閱習寇至即兩路義勇翔集赴援使其腹背受敵則河北三十餘所常伏銳兵矣朝廷下其議河北帥臣李昭亮等議曰昔唐澤潞留後李抱真籍戶丁男三選其一農隙則分曹角射歲終都試以示賞罰三年皆善射舉部內得勁卒二萬既無廩費府庫益實乃繕甲兵爲戰具遂

雄視山東是時天下稱昭義步兵冠於諸軍此近代之顯效而或謂民兵祇可城守難備戰陣非通論也但當無事時便分義勇為兩路置官統領以張用兵之勢外使敵人疑而生謀內亦搖動衆心非計之得姑令在所點集訓練三二年間武藝稍稍精漸習行陣遇有警得將臣如抱真者統馭制其陣隊示以賞罰何敵不可戰哉至於部分布列量敵應機繫於臨時便宜亦難預圖況河北河東皆邊州之地自置義勇州縣以時按閱耳目

已熟行固無疑詔如所議治平元年宰相韓琦言古者籍民爲兵數雖多而贍至薄唐置府兵最爲近之後廢不能復今之義勇河北幾十五萬河東幾八萬勇悍純實出於天性而有物力資產父母妻子之所係若稍加練簡與唐府兵何異陝西嘗刺弓手爲保捷河北河東陝西皆控西北事當一體請於陝西諸州亦點義勇止涅手背一時不無小擾終成長利天子納其言乃遣籍陝西義勇得十三萬八千四百六十五人是時諫官司

馬光累奏謂陝西頃嘗籍鄉弓手始諭以不去鄉里既而惶為保捷正兵遣戍邊州其後不可用遂汰為民徒使一路騷然而於國無補且祖宗平一海內曷嘗有義勇哉自趙元昊反諸將覆師相繼終不能出一旅之衆涉區脫之地當是時三路鄉兵數十萬何嘗得一人之力議者必曰河北河東不用衣廩得勝兵數十萬閱教精熟皆可以戰又兵出民間合於古制臣謂不然彼數十萬者虛數也閱教精熟者外貌也兵出民間者名與

古同而實異蓋州縣承朝廷之意止求數多閱教之日
觀者但見其旗號鮮明鉦鼓備具行列有序進退有節
莫不以為真可以戰殊不知彼猶聚戲若遇敵則瓦解
星散不知所之矣古者兵出民間農桑所得皆以衣食
其家故處則富足出則精銳今既賦斂農民粟帛以給
正軍又籍其身以為兵是一家而給二家之事也如此
民之財力安得不屈臣愚以為河北河東已刺之民猶
當放還況陝西未刺之民乎帝弗聽於是三路鄉兵唯

義勇爲最盛熙寧以來則尤重蕃兵保甲之法餘多承舊制前史沿革不復具述取其有損益者著于篇南渡而後土宇雖不及前而兵制多仍其故凡其鄉兵砦兵之可攷者皆附見焉

陝西保毅開寶八年發渭州平涼潘源二縣民治城隍因立爲保毅弓箭手分戍鎮砦能自置馬免役逃死以親屬代因周廣順舊制也咸平初秦州極邊止置千人分番守戍上番人月給米六斗仲冬賜指揮使至副都

頭紫綾綿袍十將以下皂綾袍五年點陝西沿邊丁壯
充保毅凡得六萬八千人給資糧與正兵同戍邊郡慶
歷初詔悉刺為保捷軍唯秦州增置及三千人環慶保
安亦各籍置是時諸州總六千五百十八人為指揮三
十一皇祐五年涇原都總管程戡上言陝西保毅近歲
止給役州縣無復責以武技自黥刺為保捷而家猶不
免於保毅之籍或折賣田產而得產者以分數助役今
秦州僅三千人久廢農業請罷遣詔自今敢私役者計

傭坐之治平初詔置保毅田承名額者悉揀刺以爲義勇熙寧四年詔廢其軍環慶砦戶強人弓手九年詔如禁軍法上其籍隸于馬軍司廩給視中禁軍

河北忠順自太宗朝以瀛莫雄霸州乾寧順安保定軍置忠順凡三千人分番巡徼隸沿邊戰櫜巡檢司自十月悉上人給糧二升至二月輪半營農慶歷七年夏竦建議與正兵參戍八年以水沴多逋亡者權益正兵代其闕額皇祐四年權放業農後不復補

河北陝西強人砦戶強人弓手名號不一咸平四年募河北民諳契丹道路勇銳可爲間伺者充強人置都頭指揮使無事散處田野寇至追集給器甲口糧食錢遣出塞偷斫賊壘能斬首級奪馬者如賞格虜獲財畜皆畀之慶歷二年環州亦募涅手背自備戎械并馬置押官甲頭隊長戶四等以下免役上番防守月給奉廩三年涇原路被邊城砦悉置環慶二州復有砦戶康定中以沿邊弓手涅手背充有警召集防戍與保毅弓手同

大順城西谷若有強人弓手天禧慶歷間募置番戍爲
巡徼斥候日給糧人賦田八十畝能自備馬者益賦四
十畝遇防秋官給器甲下番隨軍訓練爲指揮六

河北河東強壯五代時瀛霸諸州已置咸平三年詔河
北家二丁三丁籍一四丁五丁籍二六丁七丁籍三八
丁以上籍四爲強人五百人爲指揮使百人爲都置正
副都頭二人節級四人所在置籍擇善騎射者第補校
長聽自置馬勝甲者蠲其戶役五年募其勇敢團結附

大軍爲柵官給鎧甲景德元年遣使分詣河北河東集
強壯借庫兵給糧訓練非緣邊即分番迭教寇至悉集
守城寇退營農至康定初州縣不復閱習其籍多亡乃
詔二路選補增其數爲伍保迭糾遊惰及作奸者二十
五人爲團置正副都頭各一人五都爲指揮使各以階
級伏事年二十係籍六十免取家人或他戶代之歲正
月縣以籍上州州以籍奏兵部按舉不如法者慶歷二
年悉揀以爲義勇不預者釋之而存其籍以備守葺城

池而河東強壯自此寢廢矣其募於河北者舊給塘泊河淤之田力不足以耕重苦番教應募者寡熙寧七年罷之以其田募民耕戶兩頃蠲其賦以爲保甲

河東陝西弓箭手周廣順初鎮州諸縣十戶取材勇者一人爲之餘九戶資以器甲芻糧建隆二年詔釋之凡一千四百人景德二年鎮戎軍曹瑋言有邊民應募爲弓箭手者請給以閒田蠲其徭賦有警可參正兵爲前鋒而官無資糧戎械之費詔人給田二頃出甲士一人

及三項者出戰馬一匹設堡戍列部伍補指揮使以下
據兵有功勞者亦補軍都指揮使置巡檢以統之其後
鄜延環慶涇原并河東州軍亦各募置慶歷中諸路總
三萬二千四百七十四人爲指揮一百九十二是時河
東都轉運使歐陽脩言代州岢嵐寧化火山軍被邊地
幾二三萬頃請募墾種充弓箭手詔宣撫使范仲淹議
以爲便遂以岢嵐軍北草城川禁地募人拒敵界十里
外占耕得二千餘戶歲輸租數萬斛自備弓馬涅手背

爲弓箭手既以并州明鎬沮議而止至和二年韓琦奏
訂鎬議非是曰昔潘美患契丹數入寇遂驅旁耕民內
徙苟免一時失備之咎其後契丹講和因循不復許人
復業遂名禁地歲久爲戎人侵耕漸失疆界今代州寧
化軍有禁地萬頃請如草城川募弓箭手可得田千餘
戶下并州富弼議弼請如琦奏詔其爲條視山坡川原
均給人二頃其租秋一輸川地畝五升坂原地畝三升
毋折變科徭仍指揮即山險爲屋以便居止備征防無

得擅役先是麟府豐州亦以閒田募置人結屋貸口糧
二石而德順軍靜邊砦壕外弓箭手尤爲勁勇夏人利
其地數來爭占朝廷爲築堡戍守至治平末河東七州
軍弓箭手總七千五百人陝西十州軍并砦戶總四萬
六千三百人先是康定元年詔麟府州募歸業人增補
義軍俾耕本戶故地面免其稅租其制與弓箭手畧同
而不給田熙寧二年兵部上河東七郡舊籍七千五今
籍七千陝西十郡并砦戶舊籍四萬六千三百今唯秦

鳳有砦戶三年秦鳳路經畧使李師中言前年築熟羊等堡募蕃部獻地置弓箭手迄今三年所募非良民初未嘗團結訓練竭力田事今當置屯列堡爲戰守計置屯之法百人爲屯授田於旁塞堡將校領農事休即教武技其牛具農器旗鼓之屬並官予置堡之法諸屯併力自近及遠築爲堡以備寇至寇退則悉出掩擊從之五年趙鼎爲鄜延路以其地萬五千九百頃募漢蕃弓箭手四千九百人帝嘉其能省募兵之費褒賞之六年

高言新募弓箭手頗習武技請更番代正兵歸京師詔
審度之十月詔熙河路以公田募弓箭手其旁塞民強
勇願自占田出租賦聯保伍或義勇願募或民戶願
受蕃部地者聽七年正月帶御器械王中正詣熙河路
以土田募弓箭手所募人毋拘路分遠近不依常格差
官召募仍親提舉三月王韶言河州近城川地招漢弓
箭手外其山坡地招蕃弓箭手人給地一頃蕃官兩頃
大蕃官三頃仍募漢弓箭手等爲甲頭候招及人數補

人員與蕃官同管自來出軍多爲漢兵盜殺蕃兵以爲
首功今蕃兵各願於左耳前刺蕃兵字從之十月中書
條例司乞五路弓箭手砦戶除防拓巡警及緩急事許
差發外若修城諸役即申經畧安撫鈐轄司其有擅差
發及科配和雇者並科違制之罪從之其夔州路義軍
廣南槍手土丁峒丁湖南弩手福建鄉丁槍手依此法
八年詔涇原路七駐泊就糧上下番正兵弓箭手蕃兵
約七萬餘人分爲五將別置熙河策應將副十年知延

州呂惠卿言自熙寧五年招到弓箭手只是權行差補未曾團定指揮本司見將本路團結將分團成指揮都分置立將校統轄即於臨時易爲勾集從之元豐二年計議措置邊防所言以涇原路正兵漢蕃弓箭手爲十一將分駐諸州從之三年詔凡弓箭手兵騎各以十人爲隊置引戰旗頭左右儼旗及以本屬酋首將校爲擁隊並如正軍法蕃捉生蕃敢勇山河戶亦如之凡募弓箭手蕃捉生強人山河戶不以等樣第募有保任年十

七已上弓射七斗任負帶者廊延路新舊蕃捉生環慶路強人諸路漢弓箭手廊延路歸明界保毅蕃戶弓箭手皆湟於手背四年涇原路經畧司言本路弓箭手闕地九千七百頃渭州隴山一帶川原陂地四千餘頃可募弓箭手二千餘人或不願應募乞收其地入官熙河路都經制司言乞依熙河舊例許涇原秦鳳路環慶及熙河路弓箭手投換仍帶舊戶田土耕種二年即入收官別招弓箭手皆從之五年正月廊延路經畧司乞以

新收復米脂吳堡義合細浮圖塞門五砦地置漢蕃弓箭手及春耕種其約束補職並用舊條從之二月詔提舉熙河等路弓箭手營田蕃部共爲一司隸涇原路制置司四月詔蕃弓箭手陣亡依漢弓箭手給賻弓箭手出戰因傷及病羸不能自還者並依軍例賜其家七月提舉熙河路弓箭手營田蕃部司康識無提舉營田張大寧言乞應新收復地差官分畫經界選知農事廂軍耕佃頃一人其部押人員節級及雇助人工歲入賞罰

並用熙河官莊法餘並招弓箭手營田每五十頃為一營差諳農事官一員幹當從之六年鄜延路經畧司言弓箭手於近裏縣置田兩處立戶及四丁已上乞取一丁為保甲一丁為弓箭手有二丁至三丁即且令充弓箭手詔保甲願充弓箭手者聽其見充弓箭手與當丁役毋得退就保甲陝西河東亦如之八年詔罷秦鳳路置場集教弓箭手令經畧司購求土人習教所宜立法元祐元年詔罷提舉熙河等路弓箭營田蕃部司三年

兵部言涇原路隴山一帶係官地例爲人侵冒畧無色役非自朝廷置局招置標撥無以杜絕姦弊從之其後殿前司副都指揮使劉昌祚奏根括隴山地凡一萬九百九十頃招置弓箭手人馬凡五千二百六十一賜敕書獎諭四年詔將隴山一帶弓箭手人馬別置一將管幹仍以涇原路第十二將爲名五年詔戶部遣官往熙河蘭岷路代孫路措置弓箭手土田紹聖元年樞密院言熙河蘭岷路經畧司奏本路弓箭手自展置以來累

經戰鬪內有戰功補三班差使已上之人欲並遣歸所屬差使仍以其地令親屬承刺如無即別差人承之三年正月詔自今漢蕃人互投弓箭手者官司不得收刺違者杖一百五月詔在京府界諸路馬軍槍手並改充弓箭手兼習蕃槍四年詔張詢巴宜專根括安西金城膏腴地頃畝可以招置弓箭手若干人具團結以聞元符元年二月樞密院言鍾傳奏近往涇原與章綵講究進築天都山南牟等處今相度如展置青南訥心須置

一將乞權於熙秦兩路輟那新城內土田并招弓箭手
仍置提舉官二員熙秦兩路弓箭手每指揮以三百人
爲額乞作二十指揮招置不一二年間須得數千民兵
以充武備從之七月詔陝西河東路新城砦合招弓箭
手投換其元祐八年四月不得招他路弓箭手指揮勿
用三年提舉涇原路弓箭手安師文知涇州罷提舉弓
箭手司崇寧元年九月樞密院勘會陝西五路并河東
自紹聖開斥以來疆土至廣遠者數百里近者不減百

里罷兵以來未曾措置田多膏腴雖累降詔置弓箭手
類多貧乏或致逃走州縣鎮砦汚吏豪民冒占沃壤利
不及於平民且並緣舊疆侵占新土今遣官分往逐路
提舉措置應緣新疆土田分定腴瘠招置弓箭手推行
新降條法舊弓箭手如願出佃新疆亦仰相度施行詔
湯景仁河東路董采秦鳳路陶節夫環慶路安師文廊
延路並提舉弓箭手

元符三年罷提舉司今復置

崇寧二年十一月

安師文奏據權通判德順軍事盧逢原申根括打量出

四將地分管下五砦新占舊邊壕外地共四萬八千七百三十一頃有奇乞特賜優賞詔安師文特授左朝議大夫差遣如故盧逢原特授朝請郎二年九月熙河路都轉運使鄭僅奉詔相度措置熙河新疆邊防利害僅奏朝廷給田養漢蕃弓箭手本以藩扞邊面使顧慮家產人自為力今拓境益遠熙秦漢蕃弓箭手乃在腹裏理合移出然人情重遷乞且家選一丁官給口糧團成耕夫使佃官莊遇成熟日除糧種外半入官半給耕夫

候稍成次第聽其所便從之五年三月趙挺之言遼鄯之復歲費朝廷供億一千五百餘萬鄭僅初建官莊之議朝廷令會計其歲入凡五莊之入乃能支一莊之費蓋鄯遼乃西蕃之二小國遼州謂之邈川鄯州謂之青唐與河南本為三國其地濱河多沃壤昔三國分據時民之供輸於其國厚而又每族各有酋長以統領之皆衣食贍足取於所屬之民自朝廷收復以來名為使蕃民各占舊地以居其實屢更戰鬪殺戮竄逐所存無幾

今兵將官帥臣知州多召閑民以居貪冒者或受金乃與之地又私取其羊馬駝畜然無一毫租賦供官若以昔輸於三國者百分之一入於縣官即湟州資費有餘矣帝深然之翌日知樞密院張康國入見力言不可使新民出租恐致擾動衆情且言蕃民既刺手背爲兵安可更出租賦帝因宣諭新民不可搖動兼已令多招弓箭手矣挺之奏弓箭手官給以地而不出租此中國法也若蕃兵則其舊俗既輸納供億之物出戰又人皆爲

兵非弓箭手之比今朝廷所費不貲經營數年得此西
蕃之地若無一毫之入而官吏戍卒饋餉之費皆出於
朝廷何計之拙也帝曰已令姚雄經畫時累詔令雄括
空閑地召人耕墾出課故深以挺之所奏爲然挺之又
云鄯湟之復羌人屢叛溪撝羅撒走降夏國夏國納之
時時寇邊兵不解嚴而饋運極艱和糴入粟鄯州以每
石價至七十貫湟州五十餘貫蓋倉場利於客人入中
乞取而官吏利於請給斛斗中官獲利百倍人人皆富

是以上下相蒙而為朝廷之害熙寧三年熙河運司以歲計不足乞以官茶博糴每茶三斤易粟一斛其利甚博朝廷謂茶馬司本以博馬不可以博糴於茶馬司歲額外增買川茶兩倍茶朝廷別出錢二百萬給之令提刑司封樁又令茶馬官程之邵兼領轉運使由是數歲邊用粗足及挺之再相熙河曹司屢申以軍糧不足為急乃令會去年拋降錢數共一千一百萬駄一駄價直三千至四十千二百駄所轉不可勝計今年已降撥銀

錢絹等共九百萬乃令更支兩倍茶一百萬馱張康國同進呈得旨乃密檢元豐以來茶惟用博馬指揮以進然康國不知兩倍茶自非博馬之數而何執中鄧洵武雜然和之由是兩倍茶更不支給而鄯湟兵費不給矣七年詔邊地廣而耕墾未至膏腴荒閑芻粟翔踴歲糴本不貲昨累降指揮令涇原路經畧司與提舉弓箭手司措置召人開墾以助塞下積粟爲備邊無窮之利訪聞提舉弓箭手司與經畧司執見不同措置議論不務

和協其提舉涇原路弓箭手錢歸善可罷大觀三年二月臣僚言自復西寧州饋給每多而儲積未廣買價數增市物隨踴地利不闕兵籍不敷蓋招置之術失講勸利之法未興也乞委帥臣監司講求或募或招何為而可足弓箭手之數以期予不闕或拘或誘何為而使蕃部著業而責以耕耘田既墾則穀自盈募既充而兵益振是收班超之功盡充國之利也詔熙河洮岷前後收復歲月深久得其地而未得其利得其民而未得其用

地利不闢兵籍不敷歲仰朝廷供億非持久之道可令
詳究本末條畫乘上政和三年秦鳳路經畧安撫使何
常奏自古行師用兵或騎或步率因地形兵法曰蕃兵
惟勁馬奔衝漢兵惟強弩掎角蓋蕃長於馬漢長於弩
也今則不然西賊有山間部落謂之步跋子者上下山
坡出入谿澗最能踰高超遠輕足善走有平夏騎兵謂
之鐵鷄子者百里而走千里而期最能倏往忽來若電
擊雲飛每於平原馳騁之處遇敵則多用鐵鷄子以爲

衝冒奔突之兵山谷深險之處遇敵則多用步跋子以爲擊刺掩襲之用此西人步騎之長也我諸路並塞之民皆是弓箭手地分平居以田獵騎射爲能緩急以追逐馳騁相尚又沿邊土兵習於山川慣於馳驟關東戍卒多是硬弩手及標牌手不惟扞賊勁矢亦可使賊馬驚潰此中國步騎之利也至道中王超丁罕等討繼遷是時馬上用弩遇賊則萬弩齊發賊不能措手足而遁又元豐間劉昌祚等趨靈州賊衆守隘官軍不能進於

是用牌子為先鋒賊下馬臨官軍其勢甚盛昌祚等乃以牌子踢跳閃爍振以響環賊馬驚潰若遇賊於山林險隘之處先以牌子扞賊次以勁弓強弩與神臂弓射賊先鋒則矢不虛發而皆穿心達臆矣或遇賊於平原廣野之間則馬上用弩攢射可以一發而盡殪兼牌子與馬上用弩皆已試之効不可不講前所謂勁馬奔衝強弩倚角其利兩得之而賊之步跋子與鐵鷄子皆不足破也又步兵之中必先擇其魁健材力之卒皆用斬

馬刀別以一將統之如唐李嗣業用陌刀法遇鐵鷄子
衝突或掠我陣脚或踐踏我步人則用斬馬刀以進是
取勝之一竒也詔樞密院劄與諸路經畧司四年詔西
羌久為邊患乍叛乍服謫詐不常頃在先朝使者在廷
猶或犯境今植菴積歲屢饑久困雖誓表已進羌夷之
性不保其往修脩禦於無事之時戒不虞於萃聚之際
正在今日可令陝西河東路帥臣訓練兵伍除治軍器
繕修樓櫓收積芻糧常若寇至不可謂已進誓表輒或

弛急墮其姦謀所有弓箭手蕃兵常令優恤逃亡者可
速招補貧乏者亦令貸借將佐偏裨如或輒懦失職具
名以聞或寇至失事並行軍法五年二月詔陝西河東
逐路自紹聖開拓邊疆以來及西寧湟廓洮州積石等
處新邊各有包占良田並合招置弓箭手以爲邊防籬
落至今累年曠土尚多應募人數未廣蓋緣自罷專置
提舉官隸屬經畧司事權不專頗失措置根括打量催
督開墾理斷交侵等職事盡在極邊帥臣無由親到即

今夏人通貢邊鄙安靜若不乘此委官往來督責多方
招刺弓箭手墾闢閑田補助邊計以寬飛輓之勞竊慮
因循寢久曠土愈多銷耗民兵人額有害邊防大計兼
提舉文臣玩習翰墨多務安養罕能衝冒寒暑可令陝
西河東逐路並復置提舉弓箭手司仍各選差武臣一
員充理任請給恩數等並依提舉保甲條例施行每路
各置幹當公事使臣二員仍每歲令樞密院取索逐路
招到弓箭手并開墾過地土比較優劣殿最取旨黜陟

合措置事節所差官條畫以聞八月樞密院言欲將近裏弓箭手地但有爭訟侵冒之處並行打量庶幾杜絕侵冒之弊從之是月提舉河東路弓箭手司奏本司體訪得沿邊州軍逐處招置弓箭手多將人戶舊用工開耕之地指射剗奪其舊佃人遂至失業且所出租僅比佃戶五分之一於公私俱不便今欲將係官莊屯田已有人租佃及五年者並不在招置弓箭手請射之限其河東路察訪司初不以邊防民兵爲重姑息佃戶致有

此弊欲乞應熙寧八年以前人戶租佃官田並先取問
佃人如願投刺弓箭手每出一丁許依條給見佃田二
頃五十畝充人馬地若不願充弓箭手及出丁外尚有
請占不盡地土即拘收入官從之十一月詔邊防司奏
據提舉熙河蘭湟路弓箭手何灌申漢人買田常多比
緣打量其人亦不自安首陳已及一千餘頃若招弓箭
手即可得五百人若納租稅每畝三斗五升草二束一
歲間亦可得米三萬五石草二十萬束今相度欲將漢

人置買到蕃部土田願為弓箭手者兩頃已上刺一名
四頃已上刺兩名如願者依條立定租稅輸納其巧為
影占者重為禁止從之七年三月詔熙河鄯湟自開拓
以來疆土雖廣而地利悉歸屬羌官兵吏祿仰給縣官
不可為後計仰本路帥臣相度以錢糧茶絲或以羌人
所嗜之物與之貿易田土田土既多即招置弓箭手入
耕出戰以固邊圉宣和六年七月詔已降處分陝西昨
因地震摧塌屋宇因而死傷弓箭手內合承襲人速具

保明聞奏靖康元年二月臣僚言陝西恃弓箭手為國藩籬舊隸帥府比年始置提舉弓箭手官務取數多自以為功自是選練不精遂使法制寢壞欲乞詳酌罷提舉官以弓箭手復隸帥司務求以振邊聲詔從之河東路依此四月樞密院奏陝西河東逐路漢弓箭手自來並給肥饒田近年以來多將舊人已給田分擘招刺新人蓋緣提舉官貪賞欺蔽務要數多妄行招刺無以激勸朝廷近已罷提舉官今復隸帥司所轄况當今邊事

全籍民兵若不早計深慮誤事詔令陝西五路制置使
錢蓋及陝西河東逐路帥臣相度措置將已分擘弓箭
手田土依舊改正撥還所有新招到人別行給地務要
均濟仍仰帥臣嚴切奉行是月徐處仁又奏詔並送詳
議司熙寧五年涇原路經畧司蔡挺言涇原勇敢三百
四十四人久不揀練徒有虛名臣委二將領季一點閱
校其騎射能否外除補有功者以爲隊長募極塞博軍
子嘗歷戰陣者補其闕益募熟戶蕃部以爲蕃勇敢凡

一千三百八十人騎一千一百九十四匹挽弓一石馳
逐擊刺如法其有功者受勇敢下等奉餘遇調發則人
給奉三百益以芻糧詔諸路如挺言行之六年樞密院
言勇敢効用皆以材武應募從軍廩食既優戰馬戎械
之具皆出公上平時又得以家居以勞効賞者凡四補
而至借職校弓箭手減十資淹速相遠甚非朝廷第功
均賞之意請自今河東鄜延秦鳳環慶熙河路各以三
百涇原路以五百為額第一等步射弓一石一斗馬射

九斗奉錢千第二等以下遞減一斗奉七百至五百季
首閱試於經畧司射親及野戰中者有賞全不中者削
其奉次季又不中者罷之戰有功者以八等定賞一給
公據二以為隊長三守闕軍將四軍將五殿侍六三班
借差七差使八借職其弓箭手有功亦以八等定賞一
押官承局二將虞候十將三副兵馬使軍使四副指揮
使五都虞候六都指揮使七三班差使八借職即以闕
排連者次遷元豐三年詔涇原路募勇敢如鄜延路以

百人爲額自是以後蕃部益衆而弓箭手多蕃兵矣

弓箭社河北舊有之熙寧三年十二月知定州滕甫言
河北州縣近山谷處民間各有弓箭社及獵射人習慣
便利與夷人無異欲乞下本道逐州縣並令募諸色公
人及城郭鄉村百姓有武勇願習弓箭者自爲之社每
歲之春長吏就閱試之北人勁悍緩急可用從之元祐
八年十一月知定州蘇軾言北邊久和河朔無事沿邊
諸郡軍政少弛將驕卒惰緩急恐不可用武藝軍裝皆

不逮陝西河東遠甚雖據即目邊防事勢三五年間必無警急然居安慮危有國之常備事不素講難以應變臣觀祖宗以來沿邊要害屯聚重兵止以壯國威而消敵謀蓋所謂先聲後實形格勢禁之道耳若進取深入交鋒兩陣猶當雜用禁旅至於平日保境備禦小寇即須專用極邊土人此古今不易之論也晁錯與漢文帝畫備邊策不過二事其一曰徙遠方以實空虛其二曰制邊縣以備敵國寶元慶歷中趙元昊反屯兵四十餘

萬招刺宣毅保捷二十五萬人皆不得其用卒無成功
范仲淹劉滄种世衡等專務整緝蕃漢熟戶弓箭手所
以封殖其家砥礪其人者非一道藩籬既成賊來無所
得故元昊復臣今河朔西路被邊州軍自澶淵講和以
來百姓自相團結爲弓箭社不論家業高下户出一人
又自相推擇家資武藝衆所服者爲社頭社副錄事謂
之頭目帶弓而鋤佩劍而樵出入山坡飯食長技與敵
國同私立賞罰嚴於官府分番巡邏舖屋相望若透漏

北兵及本土強盜不獲其當番人皆有重罰遇其警急擊鼓頃刻可致千人器甲鞍馬常若寇至蓋親戚墳墓所在人自為戰敵深畏之先朝名臣帥定州者韓琦龐籍皆加意拊循其人以為爪牙耳目之用而籍又增損其約束賞罰熙寧六年行保甲法強壯弓箭社並行廢罷熙寧七年應兩地供輸人戶除元有弓箭社強壯并義勇之類並依舊存留外更不編排保甲看詳上件兩次聖旨除兩地供輸村分方許依舊置弓箭社其餘並

合廢罷雖有上件指揮公私相承元不廢罷只是令弓箭社兩丁以上人戶兼充保甲以至逐捕本界及他盜賊並皆驅使弓箭社人戶用命捉殺見今州縣全藉此等寅夜防拓灼見弓箭社實為邊防要用其勢決不可廢但以兼充保甲之故召集追呼勞費失業今雖名目俱存責其實用不逮往日臣竊謂陝西河東弓箭手官給良田以備甲馬今河朔沿邊弓箭社皆是人戶祖業田產官無絲毫之損而捐軀捍邊器甲鞍馬與陝西河

東無異苦樂相遠未盡其用近日霸州文安縣及真定府北砦皆有北兵驚劫人戶捕盜官吏拱手相視無如之何以驗禁軍弓手皆不得力向使州縣逐處皆有弓箭社人戶致命盡力則北兵豈敢輕犯邊砦如入無人之境臣已戒飭本路將吏申嚴賞罰加意拊循其人輒復拾用龐籍舊奏約束稍加增損別立條目欲乞朝廷立法少賜優異明設賞罰以示懲勸今已密切取會到本路極邊定保兩州安肅廣信順安三軍邊面七縣一

砦內管自來團結弓箭社五百八十八社六百五十一
火共計三萬一千四百一十一人若朝廷以為可行立
法之後更勅將吏常加拊循使三萬餘人分番晝夜巡
邏盜邊小寇來即擒獲不至埋伏以生戒心而事皆循
舊無所改作敵不疑畏無由生事有利無害較然可見
奏凡兩上皆不報政和六年詔河北路有弓箭社縣分
已令解發異等其逐路縣令佐俟歲終教閱異等帥司
具優劣之最各取旨賞罰以為勸沮仍具為令又高陽

關路安撫司言大觀三年弓箭社人依保甲法政和保甲格較最優劣縣令各減展磨勘年有差詔依保甲格賞罰施行宣和七年二月臣僚言往年西路提刑梁揚祖奏請勸誘民戶充弓箭社繼下東路令倣西路例招誘原立法之意不過使鄉民自願入社者閱習武備爲禦賊之具爾奈何邀功生事之人唯以入社之民衆多爲功厚誣朝廷而斂怨于民督責州縣急於星火取五等之籍甲乙而次之家至戶到追胥迫脅悉驅之入社

更無免者法始行於西路西路既已冒受厚賞於是東路憲司前後論列誕謾滋甚近者東路之奏數至二十四萬一千七百人武藝優長者一十一萬六千且云比之西路僅多一倍陛下灼知其不然雖命帥臣與廉訪使者覈實彼安肯以實聞乎今東路憲司官屬與登淄兩州當職官坐增秩者幾二十人而縣令佐不及焉不知出入阡陌間勸誘者誰歟此其誕謾可知矣審如所奏山東之寇何累月淹時未見殄滅哉則其所奏二十

四萬與十一萬殆虛有名不足以捍賊明矣大抵因緣追擾民不堪其勞則老弱轉徙道路強壯起爲盜賊此亦致寇之一端也近者仰煩陛下遣將出師授以方畧又命近臣持詔撫諭至於發內庫之藏轉淮甸之粟以振給之寬免其稅租蕩宥其罪戾丁寧纖悉罔不曲盡方將歸伏田畝以爲遷善遠罪之民詎可以其所甚病擾之邪且私有兵器在律之禁甚嚴三路保伍之法雖於農隙以講武事然猶事畢則兵器藏於官府今弓箭

社一切兵器民皆自藏於家不幾於借寇哉望陛下斷
自聖心罷京東弓箭社之名所藏兵器悉送之官使民
得免非時追呼迫脅之擾以安其生應兩路緣弓箭社
推恩者並追奪改正首議之人重賜黜責後來奏請誕
謾亦乞特賜施行庶幾羣下悚懼不敢妄進曲說以肆
其姦實今日之先務也詔並依奏梁揚祖落職兵器並
拘入官弓箭社人依已降指揮放散

宋史卷一百九十

欽定四庫全書

宋史卷一百九十一

元中書右丞相總裁托克托等修

兵志第一百四十四

兵五 鄉兵二

河北河東陝西義勇
川陝土丁

陝西護塞
荆湖義軍土丁弩手

夔施黔思等處義軍土丁
廣南西路土丁

廣南東路槍手

邕欽溪洞壯丁
江南西路槍仗手

福建路槍仗手
蕃兵

河北河東陝西義勇慶歷二年選河北河東強壯并抄民丁涅手背爲之戶三等以上置弩一當稅錢二十三等以下官給各營於其州歲分兩番訓練上番給奉廩犯罪斷比廂軍下番比強壯治平元年詔陝西除商虢二州餘悉籍義勇凡主戶三丁選一六丁選二九丁選三年二十至三十材勇者充止涅手背以五百人爲指揮置指揮使副二人正都頭三人十將虞候承局押官各五人歲以十月番上閱教一月而罷又詔秦州成紀

等六縣有稅戶弓箭手砦戶及四路正充保毅者家六
丁刺一九丁刺二有買保毅田承名額者三丁刺一六
丁刺二九丁刺三悉以爲義勇是歲詔秦隴儀渭涇原
邠寧環慶鄜延十二州義勇遇召集防守日給米二升
月給醬菜錢三百蓋慶歷初河北路總十八萬九千三
十一人河東路總七萬七千七十九人陝西路治平初
總十五萬六千八百七十三人熙寧初樞密使呂公弼
請以河北義勇每指揮揀少壯藝精者百人爲上等手

背添刺上等字旌別教閱及數外藝優者亦籍之俟有
闕則補從之十二月詔河北義勇縣以歲閱當閱于州
者宜分番歲以一番災傷當罷者聽旨其以指揮分番
者大名府五十三為四番真定瀛洺邢滄定冀恩趙深
磁相博自三十九以及十二並為三番德祁澶棣霸濱
永靜永寧懷衛乾寧莫保通利自十一以及四並為二
番九指揮已上者再分本番為三教始十月止十二月
六指揮已上者再分本番為二教始十月止十一月終

滿一月罷遣帝嘗問陳升之曰侯叔獻言義勇上番何如王安石曰此事似可爲但少須年歲間議之升之曰今募兵未已且養上番義勇則調度尤不易安石曰言募兵之害雖多及用則患少以民與兵為兩途故也十二月帝言義勇可使分為四番出戍呂公弼曰須先省得募兵乃可議此安石曰計每歲募兵死亡之數乃以義勇補之可也陳升之欲令義勇以漸戍近州安石曰陛下若欲變數百年募兵之弊則宜果斷詳立法制不

然無補也帝以爲然曰須豫立定條法不要宣布以漸推行可也兩府議上番或以爲一月或以爲一季且令近戍文彥博等又言難使遠戍安石辯之甚力是月兵部上陝西河北河東義勇數陝西路二十六郡舊籍十五萬三千四百益以環慶延州保毅弓箭手三千八百總十五萬六千八百為指揮三百二十一河北三十三郡舊籍十八萬九千二百今籍十八萬六千四百為指揮四百三十而河東二十郡自慶歷後總七萬七千為

指揮一百五十九凡三路義勇之兵總四十二萬三千五百人三年七月王安石進呈蔡挺乞以義勇為五番教閱事帝患密院不肯措置安石曰陛下誠欲行則孰能禦此在陛下也涇渭儀原四州義勇萬五千人舊止戍守經畧使蔡挺始令遇上番依諸軍結隊分隸諸將選藝精者遷補給官馬月廩時帑郊賞與正兵同遂與正兵相參戰守時土兵有闕召募三千人挺奏以義勇點刺累年雖訓練以時而未施於征防意可以案府兵

遺法俾之番戍以補土兵闕詔復問以措置遠近番之法挺即條上以四州義勇分五番番三千人防秋以八月十五日止十月罷防春以正月十五日止三月罷周而復始詔從之行之諸路九月秦鳳經畧安撫司言保毅人數不曾揀充義勇而其子孫轉易田土分煙析姓少有正身乞令保毅軍已於丁數內揀刺充義勇者與免承認保毅從之十月韓絳乞差著作佐郎呂大忠等赴宣撫司以備提舉義勇從之是月韓絳言今將義勇

分為七路延丹坊為一路邠寧環慶為一路涇原儀渭
為一路秦隴為一路陝解同河中府為一路階成鳳州
鳳翔府為一路乾耀華永興軍為一路逐年將一州之
數分為四番緣邊四路十二州每年秋冬合用一番屯
戍近裏三路十二州軍即令依此立定番次未得逐年
差發遇本處闕少正兵即得勾抽或那往次邊守戍從
之十一月判延州郭達言陝西起發義勇赴緣邊戰守
今後並令自齎一月糗糧折本戶稅賦若不能自備則

就所發州軍預請口食一月從之十二月司馬光上疏
曰臣以不才兼領長安一路十州兵民大柄到官以來
伏見朝廷及宣撫等司指揮分義勇作四番欲令以次
於緣邊戍守選諸軍驍銳及募閭里惡少以爲奇兵造
乾糧炒飲布囊力車以備餽運悉取歲賜趙秉常之物
散給緣邊諸路又竭內地府庫甲兵財物以助之且以
永興一路言之所發人馬甲八千副錢九萬貫銀二萬
三千兩銀盃六千枚其餘細瑣之物不可勝數動皆迫

以軍期上下相驅急於星火官吏狼狽下民驚疑皆云
國家將以來春大舉六師長驅深入以討秉常之罪臣
以疎賤不得預聞廟堂之議未知茲事為虛為實昨者
親承德音以為方今邊計惟宜謹嚴守備其入寇則堅
壁清野使之來無所得兵疲食盡可以坐收其弊臣退
而思念聖謀高遠深得王者懷柔遠人之道實天下之
福及到關中乃見凡百處置皆為出征調度臣不知有
司在外不諭聖意以致有此張皇將陛下默運神算不

令愚賤之臣得聞其實也臣不勝惶惑竊爲陛下危之
況關中饑饉十室九空爲賊盜者紛紛已多縣官倉庫
之積所餘無幾乃欲輕動大衆橫挑猛獸此臣之所大
懼也伏望陛下深鑒安危之機消之於未萌杜之於未
形速下明詔撫諭關中之民以朝廷不爲出征之計其
義勇更不分番於緣邊戍守亦不選募奇兵凡諸調發
為餽運之具者悉令停罷愛惜內地倉庫之儲以備春
深調救饑窮之人如此豈惟生民之幸亦社稷之福也

惟陛下裁察再言之甚力於是永興一路獨得免四年
詔罷陝西路義勇差役又詔罷陝西諸路提舉義勇官
委本屬州縣依舊分番教閱五年七月命崇文院校書
王安禮專一編修三路義勇條貫是月帝問王安石義
勇事如何安石曰宜先了河東一路河東舊制每年教
一月今令上番巡檢下半月或十日人情無不悅又以
東兵萬人所費錢糧且收一半或三分之二依保甲養
恤其人即人情無不忻願者閏七月執政同進呈河東

保甲事樞密院但欲爲義勇強壯不別名保甲王安石
曰此非王安禮初議也帝曰今以三丁爲義勇兩丁爲
強壯三丁遠戍兩丁本州縣巡檢上番此即王安禮所
奏但易保丁爲強壯人習強壯久恐別名或致不安也
安石曰義勇非單丁不替強壯則皆第五等戶爲之又
自置弓弩及箭寄官庫須上教乃給今以府界保甲法
推之河東蓋寬利之非苦之也帝曰河東義勇強壯已
成次第今欲遣官修義勇強壯法又別令人團集保甲

如何安石曰義勇要見丁數即須隱括因團集保甲即一動而兩業就今既差官隱括義勇又別差官團集保甲即一事分爲兩事恐民不能無擾帝卒從安石議彥博請令安石就中書一面施行此事安石曰本為保甲故中書預議若止欲作義勇強壯即合令樞密院取旨施行帝曰此大事須共議乃可是月秦鳳路經畧呂公弼乞從本司選差官自十月初擇諸州上番義勇材武者以爲上義勇免齎送芻糧之役募養馬者為有馬上

義勇并免其本戶支移從之六年九月詔義勇人員節級名闕須因教閱排連遷補十月熙河路經畧司言乞許人投換義勇以地給之起立稅額以官地招弓箭手仍許近裏百姓壯勇者占射依內地起稅排保甲即義勇願投充及民戶願受蕃部地者聽之其頃畝令經畧司以肥瘠定數十一月詔永興軍河中府陝解同華鄜延丹坊邠寧環慶耀十五州軍各依元刺義勇外商號州保安軍並止團成保甲七年詔義勇正身不許應募

充刺已應募者召人對替八年四月詔韓琦等曰河朔義勇民兵置之歲久耳目已熟將校甚整教習亦良然團結保甲一道紛然義勇舊人十去其七或撥入保甲或放而歸農得增數之虛名破可用之成法此又徒起契丹之疑也七月詔應義勇家人投軍後本戶餘丁數少合免義勇並許投軍十月詔五路義勇每年赴州教保甲赴縣教並自十月至次年正月終義勇不及十指揮保甲不及十都者自十二月起教各據人數分定番

次教閱一月不許拆破指揮都保其人數少處只作一番兩番不須滿所教月分其年已上番者止教半月十二月詔五路義勇並與保丁輪充及檢察盜賊有違犯依保丁法九年正月詔義勇保甲逐年遇閱日比試所習武藝五路每州以二十分爲率取一分爲五等第一第解發四月詔河北西路義勇保甲分三十六番隨便近村分於巡檢縣尉下上番半月一替歲於農閑月并下番人並令所轄巡檢縣尉擇寬廣處聚教五日每月

兵部言舊條義勇保甲所習事藝以十分為率弓不得過二分槍刀共不得過二分餘並習弓弩詔槍手依舊專習外刀牌手令兼習弓弩仍額樣下五路施行九月詔永興秦鳳等路義勇以主户三丁以上充不拘户等是年諸路所管義勇河北東路三萬六千二百一十八人河北西路四萬五千七百六十六人永興軍路八萬七千九百七十八人秦鳳路三萬九千九百八十人河東路三千五百九十五人總二十四萬七千五百三十

七人元豐二年中書樞密院請河北陝西義勇保甲皆如諸軍誦敎閱法從之三年詔五路轉運提舉官巡歷所至按閱見敎義勇保甲不如法者牒提點刑獄司施行四年蒲宗孟言乞開封府五路義勇並改為保甲自此以次行於諸路矣

此後義勇改為義勇保甲載保甲篇

陝西護塞慶歷元年募土人熟山川道路蕃情善騎射者湟背充二百人為指揮自備戎械就鄉閭習武技季一集州教閱無事放營農月給鹽茗有警召集防守即

廩給之無出本路

川陝土丁熙寧七年經制瀘州夷事熊本募土丁五千人入夷界捕戮水路大小四十六村蕩平其地二百四十里募民墾耕聯其夷屬以爲保甲元祐二年瀘南沿邊安撫使司言請應瀘人因邊事補授班行自備土丁子弟在本家地分防拓之人更無廩給酬賞若遇賊臨時取旨其敢邀功生事重寘于法從之政和六年瀘南安撫使孫義叟奏邊民冒法買夷人田依法盡拘入官

招置土丁子弟見招到二千四百餘人欲令番上從之
宣和四年詔茂州石泉軍舊管土丁子弟番上守把不
諳射藝其選施黔兵善射者各五十人分任教習候精
熟日遣回

荆湖路義軍土丁弩手不見創置之始北路辰澧二州
南路全邵道永四州皆置蓋溪洞諸蠻保據巖險叛服
不常其控制須土人故置是軍皆選自戶籍蠲免徭賦
番戍砦柵大率安其風土則罕嬰瘴毒知其區落則可

制狡獪其校長則有都指揮使副都指揮使指揮使副
指揮使都頭副都頭軍頭頭首採斫招安頭首十將節
級皆叙功遷補使相綜領施之西南實代王師有禦侮
之備而無饋餉之勞其後荆南歸峽鼎郴衡桂陽亦置
慶歷二年北路總一萬九千四百人南路總五千一百
五十人番戍諸砦或以歲或以季或以月上番人給口
糧有功遷補自都副指揮使歲給綿袍月給食錢指揮
使給食錢指揮給紫大綾綿袍都頭已上率有廩給熙

寧元年籍荆湖南北路義軍凡一萬五千人軍政如舊
制六年諸路行保甲司農寺請令全邵二州土丁弩手
弩團與本村土人共為保甲以正副指揮使兼充都副
保正以都頭將虞候頭首都甲頭兼充保長以左右節
級甲頭兼充小保長番上則本鋪上丁弩手弩團等同
為一保其隔山嶺不及五大保者亦各置都保正一人
元祐七年選差邵州邵陽武崗新化等縣中等以下戶
充土丁弩手與免科役七年一替排補將級不拘替故

年分作兩番邊砦防拓不得募人凡上番依禁軍例教閱武藝及專習木弩如有私役並論如私役禁軍敕紹聖二年樞密院言荆湖南路安撫轉運提刑常平司奏請邵州管下緣邊堡砦置弩手一千四百人乞依元豐六年詔於五等戶輪差並半年一替其上番人如有故許家人少壯有武藝者代充從之崇寧二年荆湖南路安撫鈐轄李闕言收復綏寧縣上堡里臨口砦合用防拓弩手十人乞於邵州邵陽武岡兩縣中等以下戶選

差半年一替遇上番月支錢米排補階級自正副使而下至左右甲頭依舊為七階分兩番部轄令邵州給帖從之政和七年以辰沅澧等州更戍土丁與營田土丁名稱重疊將兵馬都鈐轄司招填土丁改為鼎澧路營田刀弩手重和元年辰州招到刀弩手二千一百人其官吏各轉官減磨勘年有差宣和四年靖州通道縣有邊警詔添置刀弩手二千人

夔州路義軍土丁壯丁州縣籍稅戶充或自溪洞歸投

分隸邊砦習山川道路遇蠻入寇遣使襲討官軍但據險策應之其校長之名隨州縣補置所在不一職級已上冬賜綿袍月給食鹽米麥鐵錢其次紫綾綿袍月給鹽米其次月給米鹽而已有功者以次遷施黔思三州義軍土丁總隸都巡檢司施州諸砦有義軍指揮使把截將砦將并土丁總一千二百八十一人壯丁六百六十九人又有西路巡防殿侍兼義軍都指揮使都頭十將押番砦將黔州諸砦有義軍正副指揮使兵馬使都

頭砦將把截將并壯丁總千六百二十五人思州洪杜
彭水縣有義軍指揮使巡檢將砦將科理旁頭把截部
轄將并壯丁總千四百二十二人

渝州懷化軍漆州江津巴縣巡遏將皆州縣調補其戶
下率有子弟各丁遇有寇警一切責辦主戶巡遏把截
將歲支料鹽襖子領三年其地內無寇警乃給有勞者
增之州縣籍土丁子弟并器械之數使分地戍守嘉祐
中補涪州賓化縣夷人為義軍正都頭副都頭把截將

十將小節級月給鹽有功以次遷及三年無夷賊警擾
即給正副都頭紫小綾綿旋欄一涪陵武龍二縣巡遏
將若一人以物力户充免其役其義軍土丁歲以籍上
樞密院

廣南西路土丁嘉祐七年籍稅户應常役外五丁點一
為之凡得三萬九千八百人分隊伍行陣習槍鏢排冬
初集州按閱後遞歲州縣迭教察視兵械以防收刈改
用十一月教一月罷熙寧七年知桂州劉彝言舊制宜

融桂邕欽五郡土丁成丁已上者皆籍之既接蠻徼自
懼寇掠守禦應援不待驅策而近制主户自第四等以
上三取一以爲土丁而旁塞多非四等以上若三丁籍
一則減舊丁十之七餘三分以爲保丁保丁多處內地
又俟其益習武事則當蠲上丁之籍恐邊備有闕請如
舊制便奏可元豐六年廣西經畧使熊本言宜州土丁
七千餘人緩急可用欲令所屬編排分作都分除防盜
外緣邊有警聽會合掩捕從之元符二年廣西察訪司

言桂宜融等用土丁緣邊防拓差及單丁乞差兩丁以上之家從之

廣南東路槍手嘉祐六年廣惠梅潮循五州以戶籍置三等已上免身役四等以下免戶役歲以十月一日集縣閱教治平元年詔所在遣官按閱一月罷有闕即招補不足選本鄉有武技者充熙寧元年詔廣州槍手十之三教弓弩手是歲會六郡槍手為指揮四十一總一萬四千七百有奇三年知廣州王靖言東路槍手自至

和初立爲土丁之額農隙肄業一月乃古者寓兵於農之策也然訓練勸獎之制未備請比三路義勇軍政教法條上約束四年知封州鄧中立請以本路未置槍手州縣如廣惠等五郡例置奏可六年廣東駐泊楊從先言本路槍手萬四千今爲保甲兩丁取一得丁二十五萬三丁取一得丁十三萬以少計之猶十倍於槍手願委路分都監二員分提舉教閱詔司農寺定法以聞其後戶四等以上有三丁者以一爲之每百人爲一都一

都之下為一指揮自十一月至二月月輪一番閱習凡三日一試擇其技優者先遣之七年詔廣南東西路舊槍手土丁戶依河北陝西義勇法三丁選一餘州無槍手土丁者勿置九年兵部言廣惠循潮南恩五郡槍手請籍主戶第以上壯丁毋過舊額一萬四千餘以為保甲奏可元豐二年詔廣惠潮封康端南恩七州皆並邊外接蠻徼宜依西路保甲教習武藝時又詔虔州槍仗手以千五百撫州建昌軍鄉丁關軍槍仗手各以千七

百為額監司以農隙按閱武藝如廣東制

邕欽溪洞壯丁治平二年廣南西路安撫司集左右兩江四十五溪洞知州洞將各占隣迭為救應仍籍壯丁補校長給以旗號峒以三十人為一甲置節級五甲置都頭十甲置指揮使五十甲置都指揮使總四萬四千五百人以為定額各置器械遇有寇警召集之二年一閱察視器械有老病並物故名闕選少壯者填三歲一上熙寧中王安石言募兵未可全罷民兵則可漸復至

於二廣尤不可緩今中國募禁軍往戍南方多死害於
仁政陛下誠移軍職所得官十二三鼓舞百姓豪傑使
趨為兵則事甚易成於是蘇軾請訓練二廣洞丁舊制
一歲教兩月安石曰訓練之法當什伍其人拔其材武
之士以為什伯之長自首領以下各以祿利勸獎使自
勤於閱習即事藝可成部分可立緩急可用六年廣南
西路經畧沈起言邕州五十一郡峒丁凡四萬五千二
百請行保甲給戎械教陣隊藝出衆者依府界推恩補

授奏可九年趙高征交趾入辭帝諭以用峒丁之法當
先誘以實利然後可以使人甘言虛辭豈能責其效命
比鄜延集教蕃兵賴卿有以制之使輕罪可決重罪可
誅違西夏則其禍遠違帥臣則其禍速合於兵法畏我
不畏敵之義故能責其效命王師之南卿宜選募勁兵
數千擇衆將領之以脅諸峒諭以大兵將至從我者有
賞其不從者按族誅之兵威既振先脅右江右江既附
復脅左江兩江附則諸蠻無不附者然後以攻交人劉

紀巢穴甚非難也郭達性吝嗇卿宜諭以朝廷兵費無所惜達復事崖岸不通下情將佐莫敢言者卿至彼以朕語詔之十年樞密院請邕欽峒丁委經畧司提舉同巡檢總蒞訓練之事一委分接歲終上藝優者與其酋首第受賞五人為保五保為隊第為三等軍功武藝出衆為上蠲其徭役人材矯捷為中蠲其科配餘為下邊盜發則酋長相報率族衆以捍寇十一月詔邕欽丁壯自備戎械貧者假以官錢金鼓旗幟官給間歲大閱畢

則斂藏之元豐元年經畧司請集兩江峒丁為指揮權補將校奏可二年廣西經畧司言團結邕欽峒丁為指揮一百七十五籍武藝上等一萬三千六百七人詔下諸臣獻議措置峒丁事付曾布參酌損益創為規畫務令詳盡便於施行布乃請令鎮砦監押砦主同管轄兵甲使臣與巡檢等分定州峒總制立賞罰懲勸增置都巡檢使兩員分提舉及增首領丁壯歲閱之以武藝絕倫者聞量材補授詔增都巡檢使二員餘下熊本擇其

可者施行之五年詔廣南保甲如戎瀘故事自置裏頭
無刃槍竹標排木弓刀蒿矢等習武技遇捕盜則官給
器械六年詔樞密承旨司講議廣西峒丁如開封府界
保甲集教團教法是年提點廣西路刑獄彭次雲言邕
苦瘴癘請量留兵更戍餘用峒丁以季月番上給禁軍
錢糧詔許彥先度之彥先等言若盡以代正兵恐妨農
請計戍兵三之一代以峒丁季輪二千赴邕州肄習武
事從之大觀二年詔熙寧團集左右江峒丁十餘萬衆

自廣以西賴以防守今又二十萬衆來歸已令張莊依左右江例相度聞奏尚慮有司不知先務措置滅裂今條畫行下其所修法入熙河蘭湟秦鳳路敕遵行之

福建路槍仗手元豐元年轉運使蹇周輔言廖恩為盜以槍仗手捕殺乃有冒槍仗手之名乘賊勢驚擾村落患有甚於廖恩者詔犯者特加刺配周輔請額定槍仗手人數歲集閱之下其章兵部兵部請依保甲法編排罷舊法以隸提刑司居相近者五人為小保保有長五

小保為一大保長十大保為一都副保正具教閱捕盜賊食直等令頒馬總一萬二百人有奇以歲之農隙部使者分閱依弓手法賞之二年立法聽自置兵械寄於官遇捕盜乃給數外置者從私有法元祐元年御史上官均言福建路往年因寇盜召募槍手多至數百人少不下一二百人每歲監司親至按試犒賞比至閱視其老弱不閑武技者十七八監司所至多先期呼集既至往往代名充數冒受支賞徒有呼集之勞而無校試之

實欲乞重行考覈不必充滿舊數庶幾得實靖康元年臣僚言天下步兵之精無如福建路槍仗手出入輕捷馭得其術一可當十乞選官前去召募從之

江南西路槍仗手熙寧十年詔籍虔汀漳三州鄉丁槍手等以制置盜賊司言三州壤界嶺外民喜販鹽且為盜非土人不能制故也元豐二年詔虔州槍仗手五百三十六人撫州建昌軍鄉丁關軍各千七百七十八人為定額每歲農隙輪監司提舉司官案閱武藝以備姦

盜從前江西轉運副使蔣之奇請也宣和三年兵部言近因江西漕臣謂本路槍仗手元豐七年以八千三十五人為額至元祐中減罷七千一百四十二人元符間雖嘗增立人數比之元額猶減其七乞詔諸路監司帥臣並遵熙寧舊制補足元額從之

蕃兵者具籍塞下內屬諸部落團結以為藩籬之兵也西北邊羗戎種落不相統一保塞者謂之熟戶餘謂之生戶陝西則秦鳳涇原環慶鄜延河東則石隰麟府其

大首領為都軍主百帳以上為軍主其次為副軍主都
虞候指揮使副兵馬使以功次補者為刺史諸衛將軍
諸司使副使承制崇班供奉官至殿侍其充本族巡檢
者奉同正員月添支錢十五千米麪兼馬有差刺史諸
衛將軍請給同蕃官例首領補軍職者月奉錢自三千
至三百又歲給冬服綿袍凡七種紫綾三種十將而下
皆給田土康定初趙元昊反先破金明砦殺李士彬父
子蕃部既潰乃破塞門安遠砦圍延州二年陝西體量

安撫使王堯臣言涇原路熟戶萬四百七十餘帳之首領各有職名曹瑋帥本路威令明著常用之以平西羌其後守將失於撫馭寔成驕黠自元昊反鎮戎軍及渭州山外皆被侵擾近界熟戶亦遭殺擄蕃族之情最重酬賽因其釁隙而激怒之可復得其用請遣人募首領願效用者籍姓名及士馬之數數及千人聽自推有謀勇者授班行及巡檢職名使將領出境破蕩生戶所獲財畜官勿檢覈得首級及傷者給賞仍依本族職名遷

補增奉詔如所請慶歷二年知青澗城种世衡奏募蕃兵五千湟右手虎口爲忠勇字隸折馬山族言者因請募熟戶給以禁軍廩賜使戍邊悉罷正兵下四路安撫使議環慶路范仲淹言熟戶戀土田護老弱牛羊遇賊力戰可以藩蔽漢戶而不可倚爲正兵大率蕃情黠詐畏強凌弱常有以制之則服從可用如倚爲正兵必至驕蹇又今蕃部都虞候至副兵馬使奉錢止七百悉無衣廩若長行遽得禁兵奉給則蕃官必生徼望況歲罕

見敵何用長與廩給且錢入熟戶蕃部資市羊馬青鹽
轉入河西亦非策也若遇有警旋以金帛募勇猛為便
議遂格治平二年詔陝西路四駐泊鈐轄秦鳳梁寔涇
原李若愚環慶王昭明廊延韓則順各管勾本路蕃部
團結強人壯馬預為經畫寇至則老弱各有保存之所
仍諭寔等往來蕃帳受其牒訴伸其屈抑察其反側者
羈縻之勿令猜阻以萌釁隙寔等至蕃部首領稱詔犒
勞齎以金帛籍城砦兵馬計族望大小分隊伍給旗幟

使各繕保壘人置器甲以備調發仍約如令下不集押
隊首領以軍法從事自治平四年以後蕃部族帳益多
而撫御團結之制益密故別附于其後云

秦鳳路砦十三强人四萬一千一百九十四壯馬七千

九百九十一

一三陽砦十八門三十四大部族四十三姓
一百八十族總兵馬三千四百六十七○

隴城砦五門五大部族三十四小族三十四姓總兵馬
二千五十四○弓門砦三大門十七部族十七姓十七

小族總兵馬一千七百四十○治坊砦二大門二大部族
九姓九小部族總兵馬三百六十○床穰砦二大門二

大部族十一姓十一小族總兵馬一千八百○靜戎砦
門三計大部族十六姓十六小族總兵馬六百二十五

○定西砦四門四大部族十六姓二十八族總兵馬六百○伏羌砦二門二大部族三十二姓三十三小部族總兵馬一千九百九十二○安遠砦二十三門二十三大部族一百二十六姓一百二十六小族總兵馬五千三百五十○來還砦八門八大部族十九姓十九小族總兵馬一千五百七十四○寧遠砦四門四大部族三十六姓三十六小族總兵馬七千四百八十○古渭砦一百七十二門一百七十一姓十二大部族一萬六千九百七十小帳兵七千七百馬一千四百九十

廊延路軍城堡砦十蕃兵一萬四千五百九十五官馬二千三百八十二強人六千五百四十八壯馬八百十

永平砦東路都巡檢所領八族兵一千七百五十四馬四百九○青澗城二族兵四千五百十馬七百三十四

○隴安砦鬼魁等九族兵五百九十九馬一百二十九
○西路德靖砦同都巡檢所領揭家等八族兵一千一
百一十四馬一百五十○定安堡東路都巡檢所領十
六族兵一千九百八十九馬四百六十○保安軍兩族
兵三百六十一馬五十○德靖砦西路同都巡檢所領
二十族兵七千八百五十八馬七百七十七又小胡等十九
族兵六千九百五十六馬七百二十五○保安軍北都
巡檢所領厥七等九族兵一千四百四十一馬一百六
十七○園林堡兩族兵八百二十二馬九十三○肅
戎軍卞移等八族兵七百四十八馬一百二十三

涇原路鎮砦城堡二十一強人一萬二千四百六十六

壯馬四千五百八十六為一百十甲總五百五隊

新城鎮四

族總兵馬三百四十一為十六隊○截原砦六族總兵
馬五百九十六為六甲二十隊○平安砦十一族總兵

馬二千三百八十四為十甲四十六隊○開邊砦十八族總兵馬一千二百五十四為九甲四十四隊○新門砦十二族總兵馬一千七十三為三甲二十八隊○西壕砦三族總兵馬四百五十四為四甲二十隊○柳泉鎮十二族總兵馬九百八十六為七甲三十一隊○綏寧砦四族總兵馬七百八十八為四十甲三十二隊○靖安砦四族總兵馬一千九百八十二為四甲五十九隊○瓦亭砦四族總兵馬五百九十一為四甲十九隊○安國鎮五族總兵馬六百三十四為五甲二十九隊○耀武鎮一族總兵馬三十二為一隊○新砦兩族總兵馬一百九○東山砦四族總兵馬二百二為四甲九隊○彭陽城三族總兵馬一百八十四為六甲十八隊○德順軍強人三千六百七十六壯馬二千四百八十五為三十六甲一百三十五隊本軍二十一族總兵馬二千五百二為三十六隊○德隆砦七族總兵馬二百五十六為一十七甲十九隊○靜邊砦二十四族

總兵馬一千八百七為三十六隊○水洛城十九族總
兵馬一千三百五十四為十九甲三十八隊○通邊砦
五族總兵馬一百
七十六為三隊

環慶路鎮砦二十八强人三萬一千七百二十三壯馬

三千四百九十五總一千一百八十二隊

安塞砦四族
强人三百五

十一壯馬三十為十六隊○洪德砦二族强人二百七
十三壯馬五十三為十隊○肅遠砦三族强人一千五
百五十九壯馬二百六十三為六十隊○烏崙砦一族
强人六百八十四壯馬一百一十八為二十六隊○永

和砦旁家一族計六標强人一千二百五十五壯馬二
百二為四十四隊○平遠砦六族强人五百四十壯馬
八十七為二十七隊○定遠砦六族强人七百四十八
壯馬一百一十六為三十隊○合道鎮十四族强人一

千五百六十五壯馬一百八十三為十七隊○水波鎮
十四族強人二千一百六十九壯馬一百九十五為六
十一隊○石昌鎮二族強人四百六十二壯馬三十四
為十七隊○馬領鎮四族強人一千一十六壯馬八十
為二十四隊○團堡隊砦二族強人一千二十二壯馬
一百一十一為三十四隊○荔原堡十三族強人二千二
百二十一壯馬三百九十四為八十二隊○大順城二
十三族強人三千四百九十一壯馬三百十四為一百
四十一隊○柔遠砦十二族強人三千三百八十一壯
馬一千為九十隊○東谷砦十六族強人四百五十九
壯馬五十六為十四隊○西谷砦十族強人一千七百
九十四壯馬一百四十為六十五隊○淮安鎮二十七
族強人四千三百六十八壯馬三百二十一為一百七
十隊○平戎鎮八族強人一千八十五壯馬一百七十
一為四十一隊○五交鎮十族強人一千一百七壯馬
七十三為四十九隊○合水鎮四族強人六百三十一

壯馬九十五為二十四隊○鳳川鎮二十三族強人八百七十五壯馬一百四十三為二十隊○華池鎮三族強人二百六十二壯馬三十八為十二隊○葉樂鎮十七族強人一千一百七十一壯馬六十四為四十六隊○府城砦一族強人二百三十三壯馬五為七隊

治平四年郭達言秦州青雞川蕃部願獻地請於州南牟谷口置城堡募弓箭手以通秦州德順二州之援斷賊入寇之路閏三月收原州九砦蕃官三百八十一人總二百二十九族七千七百三十六帳蕃兵萬人馬千匹是歲罷四路內臣主蕃部者選逐路升朝使臣諳練

蕃情者為之熙寧元年議者謂熟羗乃唐設三使所統之党項也自西夏不臣種落叛散分寓南北為首領者父死子繼兄死弟襲家無正親則又推其旁屬之强者以為族首多或數百雖族首年幼第其本門中婦女之令亦皆信服故國家因其俗以為法其大首領上自刺史下至殿侍並補本族巡檢次首領補軍主指揮使下至十將第受廩給歲久主客族帳混淆莫紀康定中嘗遣蔣偕籍之今踰三十年主家或以累降失其先職族

首名品而客戶或以功為使臣軍班超處主家之上軍興調發有司惟視職名使號令其部曲而衆心以非主家莫肯為用請自今蕃官身歿秩高者子孫如例降等以為本族巡檢其旁邊能捍賊者給奉遠邊者如舊限以歲月其已降等或三班差使殿侍身歿無等可降者子孫不降充軍主指揮使者即以為殿侍如此則本族蕃官名品常在或其部曲立功當任官者非正親毋得為本族巡檢止增其奉其軍主至十將祖父有族帳兵

騎者子孫即承其舊限年受廩給能自立功者不用此
令如此則熟羌之心皆知異日子孫不失舊職世為我
用矣樞密院乃會河東路蕃部承襲不降資秦鳳路降
兩資涇原路蕃官告老以門內人承代亦不降資鄜延
環慶路蕃官使臣比類受職蕃官副兵馬使以上元無
奏到之人詔鄜延環慶路蕃官本族首領子孫當繼襲
者若都軍主以下之子孫勿降殿侍并差使殿侍之子
孫充都軍主借職奉職之子孫充殿侍侍禁殿直之子

孫充差使殿侍供奉官之子孫補借職承制以下子孫
補奉職其諸司副使以上子孫合繼襲者視漢官遺表
加恩二等奏可二月知青澗城劉愬言所隸歸明號箭
手八指揮凡三千四百餘人馬九百匹連歲不登願以
丹州儲糧振恤詔下其章轉運司行之二年郭逵奏蕃
兵必得人以統領之若專迫以嚴刑彼必散走山谷正
兵反受其弊當設六術以用之曰遠斥堠曰擇地利曰
從其所長曰捨其所短曰利誘其心曰戰助其力此用

蕃兵法也詔從之三年宣撫使韓絳言親奉德音以蕃
部子孫承襲者多幼弱不能統衆宜選其族人為衆信
伏者代領其事聖算深遠真得禦邊之要請下諸路帥
臣以詔從事四年詔蕃官殿侍三班差使補職或繇殿
侍遷差使及十二年常充巡檢或管幹本族公事或為
蕃官指揮或嘗備守禦之任者總管司以聞特與遷改
五年王韶招納沿邊蕃部自洮河武勝軍以西至蘭州
馬銜山洮岷宕疊等州凡補蕃官首領九百三十二人

首領給殮錢蕃官給奉者四百七十二人月計費錢四百八十餘緡得正兵三萬族長數千六年帝謂輔臣曰洮西香子城之戰官軍貪功有斬巴氐角部蕃兵以效級者人極嗟憤昔李靖分漢蕃兵各為一隊無用衆於紛亂王安石進曰李靖非素拊循蕃部者也故其教兵當如此今熙河蕃部既為我用則當稍以漢法治之使久而與漢兵如一武王用微盧彭濮人但為一法今宜令蕃兵稍與漢同而與蕃異必先錄用其豪傑漸以化

之此用夏變夷之術也帝乃詔王韶議其法帝曰岷河蕃部族帳甚衆儻撫御咸得其用可以坐制西夏亦所謂以蠻夷攻蠻夷者也陝西極塞儻會合訓練為用兵之勢以愾敵人彼必隨而聚兵以應我頻年如此自致困弊兵法所謂佚能勞之者也安石對曰朝廷當先為不可勝聚糧積財選兵而已新附之羌厚以爵賞收其豪傑賜之堅甲利兵以激其氣使人人皆有趨赴之志待我體強力充鼓行而西將無不可者馮京王珪曰儻

如聖策多方以誤之彼既疲於點集而我無攻取之實久之必不我應因爾舉兵若蹈無人之境矣帝曰此正晉人取吳之策也夫欲經營四夷宜無先於此矣帝嘗謂蕃部未嘗用兵恐以虛名內附臨事不可使安石對曰剛克柔克所用有宜王韶以為先以恩信結納其人
有強梗不服者乃以殺伐加之大抵蕃部之情視西夏與中國強弱為向背若中國形勢強附中國為利即不假殺伐自當堅附矧蕃部之俗既宗貴種又附強國今

用木征貴種等三人又稍以恩信收蕃部則中國形勢
愈強恐不假殺伐而所附蕃部自可制使帝以為然是
時王韶拓熙河地千二百里招附三十餘萬口安石奏
曰今以三十萬之衆漸推文法當即變其夷俗然韶所
募勇敢士九百餘人耕田百頃坊三十餘所蕃部既得
為漢而其俗又賤土貴貨漢人得以貨與蕃部易田蕃
人得貨兩得所欲而田疇墾殖通蕃漢為一其勢易
以調御請令韶如諸路以錢借助收息又捐百餘萬緡

養馬於蕃部且什伍其人獎勸以武藝使其人民富足
士馬強盛奮而使之則所嚮可以有功令蕃部初附如
洪荒之人唯我所御而已七年詔言討平河州叛蕃闢
土甚廣已置弓箭手又以其餘地募蕃兵弓箭手每砦
三指揮或至五指揮每指揮二百五十人給田百畝以
次蕃官二百畝大蕃官三百畝仍募漢弓箭手為隊長
稍衆則補將校暨蕃官同主部族之事其蕃弓箭手並
刺蕃兵字於左耳以防漢兵之盜殺而效首者詔如其

請十一月壬中正團結熙河界洮河以西蕃部得正兵三千八十六人正副隊將六十人供贍一萬五千四百三十人八年五月詔李承之參定蕃兵法十一月詔選陝西蕃兵丁壯戶九丁以上取五六取四五取三三取二二取一並年二十以上湟手背毋過五丁每十人置十將一五十人置副兵馬使一百人置軍使一副兵馬使一二百人置軍使一副兵馬使三四百人加軍使一副兵馬使一五百人又加指揮使一副兵馬使一過五

百人每百人加軍使一副兵馬使一即一族三十人已
上亦置副兵馬使一不及二十人止置十將月受奉仍
增給錢指揮使一千五百至十將有差十年樞密院言
陝西河東議立團結蕃部法欲如所奏上手詔曰夏人
所恃以強國者山界部落數萬之衆爾按其地誌朝廷
已據有其半彼用之則并小凌大所向如欲在我則徒
能含撫豢養未嘗得其死力豈惟不能用之又恐其為
患也故小有悖戾有司惟能以利說解之上下相習畏

憚任其縱散久失部勒其近降之法固未可信其必行
然以理言之彼此均有其人而利害遼遠今苟循邊人
衆知其說止於舊法聊改一二則收功疑亦不異往日
徒為紛紛無補於事可再下呂惠卿參詳以聞元豐六
年詔蕃官雖至大使猶處從官小使臣之下朝廷賞功
增秩以為激勵乃爾卑抑則孰知遷官之榮宜定蕃漢
官序位後河東經畧司言蕃官部堡塞兵出戰嘗以漢
官驅策恐不當與漢官序位而兵部請蕃漢非統轄者

乃令序官奏可熙河蘭會路經畧制置使李憲言治蕃兵置將領法貴簡而易行詳而難犯臣今酌蕃情立法凡熙河蘭會五郡各置都同總領蕃兵將二人本州諸部族出戰蕃兵及供贍人馬各置管押蕃兵使臣十人五郡蕃兵自為一將出戰則以正兵繼之旗幟同色蕃兵以技藝功勞第為四等蕃官首領推遷如之八月憲又言漢蕃兵騎雜為一軍語言不通居處飲食悉不便利昔李靖以蕃落自為一法臣近以蕃兵自為一將釐

漢蕃為兩軍相參號令軍事惟所使焉七年瀘南緣邊
安撫司言羅始党生界八姓各願依七姓十九姓刺充
義軍團結為三十一指揮凡一萬五千六百六十人從
之元祐元年臣僚言涇原路蕃兵人馬凡衆遇臨敵與
正兵錯雜非便詔下其章四路都總管詳議環慶范純
粹言漢蕃兵馬誠不可雜用宜於逐將各選廉勇曉蕃
情者一員專充蕃將令於平日鈐束訓練遇有調發即
令部領為便又言頃兵部議乞蕃漢官非相統轄者並

依官序相壓其城砦等管轄蕃官即依舊在本轄漢官之下詔從其請且諸路蕃官不問官職高卑例在漢官之下所以尊中國制遠人也行之既久忽然更制便與不相統轄之官依品序位即邊上使臣及京職官當在蕃官之下十有八九非人情所能堪蕃部兇驕豈可輒啟宜悉依舊制並序漢官之下從之元符二年三月涇原經畧司言乞將東西路蕃兵將廢罷仍於順便城砦隸屬遂將統領與漢兵相無差使秦鳳路如之四月環

慶路經畧安撫司言新築定邊城有西夏來投蕃部甚衆欲自今將歸順之人就新城收管給田仍乞選置總領蕃兵正副二員從之



宋史卷一百九十一

宋史卷一百九十一考證

兵志五防秋以八月十五日止十月罷防春以正月十五日止三月罷○通考兩止字俱作上字

欽定四庫全書

宋史
卷一百九十一 考證

宋史卷一百九十一 考證